

### 0.0.1 kesakambala suttaṃ

1. seyyathā'pi bhikkhave yāni kānici tantāvutānaṃ vatthānaṃ kesakambalo tesam pāvārānaṃ patikiṭṭho akkhāyati. kesakambalo bhikkhave sīte sīto, uṇhe uṇho, dubbaṇṇo duggandho dukkhasamphasso. evameva kho bhikkhave yāni kānici puthusamaṇappavādānaṃ<sup>1</sup> mak-khalivādo tesam patikiṭṭho<sup>2</sup> akkhāyati.

2. makkhalī bhikkhave moghapuriso evaṃvādī evaṃ-diṭṭhī: "natthi kammaṃ, natthi kiriyaṃ, natthi viriya"nti.

3. yepi te bhikkhave ahesuṃ atītamaddhānaṃ arahanto sammāsambuddhā, tepi bhagavanto kammavādā ceva ahesuṃ kiriyavādā ca viriyavādā ca. te'pi bhikkhave makkhalī moghapuriso paṭibāhati: "natthi kammaṃ, natthi kiriyaṃ, natthi viriya"nti.

4. yepi te bhikkhave bhavissanti anāgatamaddhānaṃ arahanto sammāsambuddhā, tepi bhagavanto kammavādā ceva bhavissanti kiriyavādā ca viriyavādā ca. te'pi bhikkhave makkhalī moghapuriso paṭibāhati: "natthi kammaṃ, natthi kiriyaṃ, natthi viriya"nti.

5. ahampi bhikkhave etarahi araham sammāsambuddho kammavādo ca kiriyavādo ca viriyavādo ca. mampi

<sup>1</sup> puthusamaṇabrāhmaṇavādānaṃ - machasaṃ

<sup>2</sup> patikiṭṭho - machasaṃ

bhikkhave makkhalī moghapuriso paṭibāhati: 'natthi kammaṃ, natthi kiriyaṃ, natthi viriya'nti.

6. seyyathā'pi bhikkhave nadīmukhe khipaṃ oḍḍeyya<sup>3</sup> bahunnaṃ<sup>4</sup> 464 macchānaṃ ahitāya dukkhāya anayāya vyasanāya. evameva kho bhikkhave makkhalī moghapuriso manussakhipaṃ maññe loke uppanno bahunnaṃ sattānaṃ ahitāya dukkhāya anayāya vyasanāyā'ti.

---

<sup>3</sup>khippaṃ oḍḍeyya - machasaṃ

<sup>4</sup>bahūnaṃ - machasaṃ.